



შპს ექვთიამ თაყაიშვილის სახელობის სასწავლო უნივერსიტეტი

*დამტკიცებულია 2017 წლის 11 მარტის
აკადემიური საბჭოს გადაწყვეტილებით N5*

**პროფესიულ საგანმანათლებლო პროგრამებზე სასწავლო
პროცესის მარეგულირებელი წესი.**

2017 წელი

ზოგადი დებულებები

1. უმაღლესი საგანმანათლებლო დაწესებულება - შპს ექვთიმე თაყაიშვილის სახელობის სასწავლო უნივერსიტეტი (შემდგომში - სასწავლო უნივერსიტეტი) სასწავლო პროცესს წარმართავს მოქმედი კანონმდებლობის, ამ წესისა და სასწავლო უნივერსიტეტში მოქმედი სხვა აქტების შესაბამისად.
2. წინამდებარე წესი განსაზღვრავს პროფესიულ საგანმანათლებლო პროგრამებზე პროფესიული სტუდენტის სტატუსის მოპოვების, შეჩერების, შეწყვეტის, მობილობის, სწავლის პერიოდში მიღებული განათლების აღიარების წესებს, საგანმანათლებლო მომსახურების ხელშეკრულების არსებით შემადგენელ პირობებს, სტუდენტის შეფასების სისტემას, საგანმანათლებლო პროგრამის შემუშავების, მასში ცვლილების შეტანის, საგანმანათლებლო პროგრამის შეცვლის ან გაუქმების შემთხვევაში პროფესიული სტუდენტების შემდგომი განათლების უზრუნველყოფის წესებს, ინფორმაციას სწავლებისა და სწავლის ფორმებისა და მეთოდების შესახებ.
3. სასწავლო უნივერსიტეტში სწავლების ძირითადი ენა არის ქართული, ხოლო სხვა ენაზე სწავლება (უცხოენოვანი საგანმანათლებლო პროგრამის განხორციელება), გარდა ინდივიდუალური სასწავლო კურსებისა, ხდება საქართველოს განათლებისა და მეცნიერების სამინისტროსთან შეთანხმებულ საგანმანათლებლო პროგრამებზე.
4. სასწავლო უნივერსიტეტში პროფესიულ საგანმანათლებლო პროგრამებზე სასწავლო პროცესის ორგანიზებას/მართვას ახორციელებენ: რექტორი, ხარისხის უზრუნველყოფის სამსახურის უფროსი, პროფესიული საგანმანათლებლო პროგრამების მენეჯერი, სასწავლო დეპარტამენტი.

მუხლი 2. პროფესიული სტუდენტის სტატუსის მოპოვება

1. წარმოდგენილი საბუთების ანალიზისა და/ან საგანმანათლებლო პროგრამებზე ჩარიცხვის მსურველების საგანმანათლებლო პროგრამის მოთხოვნებთან შესაბამისობის დადგენის შემდეგ სასწავლო უნივერსიტეტის რექტორი გამოსცემს ბრძანებას პროფესიული სტუდენტების შესაბამის პროფესიულ პროგრამებზე ჩარიცხვის შესახებ.
2. სასწავლო უნივერსიტეტის რექტორის მიერ პროფესიული სტუდენტის შესაბამის პროფესიულ პროგრამაზე ჩარიცხვის შესახებ ბრძანების გამოცემიდან ორი სამუშაო დღის ვადაში შეაქვს ჩარიცხული პროფესიული სტუდენტის შესახებ მონაცემები პროფესიული საგანმანათლებლო დაწესებულებების რეესტრში.
3. ბრძანების გამოცემის შემდეგ პროფესიული სტუდენტი ვალდებულია გაიაროს რეგისტრაცია.
4. რეგისტრაციის ვადებს განსაზღვრავს სასწავლო უნივერსიტეტის რექტორი ბრძანებით;
5. რეგისტრაციის გასავლელად, პროფესიული სტუდენტი ვალდებულია:
 - ა) გააფორმოს ან გააგრძელოს სასწავლო უნივერსიტეტთან სასწავლო ხელშეკრულება;
 - ბ) წარმოადგინოს სწავლის საფასურის გადახდის ქვითარი;
6. პროფესიულ სტუდენტს, რომელიც არ დარეგისტრირდება დადგენილ ვადაში არასაპატიო მიზეზით, უჩერდება პროფესიული სტუდენტის სტატუსი მორიგ რეგისტრაციამდე;
7. პროფესიული სტუდენტის მიერ სასწავლო უნივერსიტეტში სწავლის უფლების მოპოვების

მიზნით წარმოდგენილი დოკუმენტების სისწორეზე პასუხისმგებლობა ეკისრება პროფესიულ სტუდენტს. სასწავლო უნივერსიტეტი იტოვებს უფლებას გადაამოწმოს წარმოდგენილი დოკუმენტების ნამდვილობა, საქართველოში მოქმედი კანონმდებლობის შესაბამისად, როგორც ფორმალური ცნობის (აღიარების) ასევე ნამდვილობის დადასტურების გზით.

8. სასწავლო უნივერსიტეტი პროფესიულ სტუდენტთან აფორმებს ხელშეკრულებას სასწავლო მომსახურების შესახებ, რომელსაც ხელს აწერს სასწავლო უნივერსიტეტის სახელით რექტორი და სრულწლოვანი პროფესიული სტუდენტი ან არასრულწლოვანი პროფესიული სტუდენტის კანონიერი წარმომადგენელი - მეორე მხრიდან.
9. ხელშეკრულების ერთი ეგზემპლარი გადაეცემა პროფესიულ სტუდენტს, ხოლო მეორე ეგზემპლარი ინახება პროფესიული სტუდენტის პირად საქმეში.

მუხლი 3. პროფესიული სტუდენტის სტატუსის შეჩერება

1. სასწავლო უნივერსიტეტის პროფესიული სტუდენტი უფლებამოსილია მიმართოს სასწავლო უნივერსიტეტის რექტორს განცხადებით, მისთვის პროფესიული სტუდენტის სტატუსის შეჩერებისა და მისი სასწავლო პროცესში მონაწილეობისგან და პროფესიული სტუდენტის სხვა უფლება - მოვალეობებისგან დროებით განთავისუფლების თაობაზე.
2. ამ მუხლის პირველი პუნქტით გათვალისწინებული საფუძვლის გარდა პროფესიული სტუდენტის სტატუსის შეჩერების საფუძვლებია:
 - ფინანსური დავალიანების დადგენილ ვადებში გადაუხდელობა;
 - პროფესიული სტუდენტის მიერ სასწავლო უნივერსიტეტთან კავშირის გაწყვეტა, შესაბამისი მიზეზების დადგენამდე;
 - უცხო ქვეყანაში სწავლა;
 - სასწავლო პროცესის დაწყებიდან ზედიზედ ერთი თვის განმავლობაში არ გამოცხადება;
 - სისხლის სამართლის პასუხისმგებაში მიცემა მძიმე ან განსაკუთრებით მძიმე დანაშაულისათვის განაჩენის კანონიერძალაში შესვლამდე;
 - ავადმყოფობა;
 - მოქმედი კანონმდებლობითა და სასწავლო უნივერსიტეტის შიდა სამართლებრივი აქტებით გათვალისწინებული სხვა შემთხვევები;
3. პროფესიული სტუდენტის სტატუსის შეჩერების შესახებ გამოიცემა რექტორის ბრძანება და განხორციელდება შესაბამისი მონაცემების შეტანა პროფესიულ სტუდენტთა რეესტრში. პროფესიული სტუდენტის სტატუსის შეჩერების დროის განმავლობაში, სასწავლო უნივერსიტეტი და პროფესიული სტუდენტი თავისუფლდებიან ურთიერთსანაცვლო უფლება-მოვალეობების შესრულებისაგან, გარდა იმ უფლებებისა და მოვალეობებისა, რომლებიც წარმოიშვა სტატუსის შეჩერებამდე.
4. პროფესიული სტუდენტის სტატუსის შეჩერების შემთხვევაში სწავლისათვის გადახდილი თანხა პროფესიულ სტუდენტს უკან არ უბრუნდება. პროფესიული სტუდენტის სტატუსის აღდგენის შემთხვევაში პროფესიულ სტუდენტს ჩაეთვლება სტატუსის შეჩერებამდე სწავლის გადახდილი საფასური.
5. პირი პროფესიული სტუდენტის სტატუსის აღდგენისას სწავლის საფასურს იხდის აღდგენის დროისათვის დადგენილი ოდენობით.
6. პროფესიული სტუდენტი აღდგენის შემდეგ სწავლას აგრძელებს იმ ეტაპიდან, საიდანაც

შეუჩერდა მას პროფესიული სტუდენტის სტატუსი.

7. პროფესიულ სტუდენტს უფლება აქვს სტატუსის აღდგენის მოთხოვნით მიმართოს საწავლო უნივერსიტეტის რექტორის მიერ ბმანებით გამოცხადებულ პროფესიულ საგანმანათლებლო პროგრამაზე მიღების ვადებში.
8. პროფესიული სტუდენტისათვის სტატუსის აღდგენა შესაძლებელია თუკი აღმოფხვრილი იქნება ის გარემოებები, რაც გახდა პირისათვის პროფესიული სტუდენტის სტატუსის შეჩერების საფუძველი.
9. პროფესიული სტუდენტისათვის სტატუსის აღდგენის შესახებ გამოიცემა სასწავლო უნივერსიტეტის რექტორის ბრძანება და განხორციელდება შესაბამისი მონაცემების შეტანა პროფესიულ სტუდენტთა რეესტრში.
10. პროფესიული სტუდენტის სტატუსის შეჩერების მაქსიმალური/მინიმალური ვადები განისაზღვრება ინდივიდუალურად რექტორის ბრძანებით.
11. იმ შემთხვევაში, თუ ის პროფესიული საგანმანათლებლო პროგრამა, რომელზედაც ირიცხებოდა პროფესიული სტუდენტი მისთვის სტატუსის შეჩერებამდე გაუქმებულია, ან შეცვლილია მისთვის პროფესიული სტუდენტის სტატუსის აღდგენის მომენტისათვის, პროფესიული სტუდენტი უფლებამოსილია სწავლა გააგრძელოს ყველაზე მსგავს საგანმანათლებლო პროგრამაზე ან გადავიდეს სხვა დაწესებულებაში, კანონმდებლობით დადგენილი წესითა და სასწავლო უნივერსიტეტის შიდასამართლებრივი აქტების შესაბამისად.

მუხლი 4. პროფესიული სტუდენტის სტატუსის შეწყვეტა

1. პროფესიული სტუდენტის სტატუსის შეწყვეტის საფუძველებია:
 - ა) პირადი ან კანონიერი წარმომადგენილს განცხადება;
 - ბ) შეჩერებული სტატუსის მქონე პროფესიული სტუდენტისათვის სამართლებრივი აქტით დადგენილი სტატუსის შეწყვეტის ვადის დადგომა.
 - გ) გარდაცვალება.
2. პროფესიული სტუდენტის სტატუსის შეწყვეტა ფორმდება სასწავლო უნივერსიტეტის რექტორის დასაბუთებული ბრძანებით.
3. პროფესიული სტუდენტის სტატუსის შეწყვეტა იწვევს პროფესიულ სტუდენტთან დადებული ხელშეკრულების მოშლას, რაც არ ანთავისუფლებს მხარეებს ხელშეკრულების მოშლამდე წარმოშობილი და შეუსრულებელი ურთიერთვალდებულებების შესრულებისგან.
4. პირის მიერ, რომელსაც შეუწყდა პროფესიული სტუდენტის სტატუსი მოთხოვნის შემთხვევაში სასწავლო უნივერსიტეტი უზრუნველყოფს მოთხოვნილი დოკუმენტების გაცემას მისი პირადი საქმიდან გონივრულ ვადებში.
5. პროფესიული სტუდენტის სტატუსის შეწყვეტა შესაძლებელია გასაჩივრდეს სასამართლოში კანონმდებლობით დადგენილი წესით.
6. პროფესიული სტუდენტის სტატუსის შეწყვეტის შემთხვევაში მისი ხელახლა მოპოვება დასაშვებია იმ დროისათვის დადგენილი წესით.

მუხლი 5. პროფესიული სტუდენტის მობილობა

1. პროფესიულ სტუდენტს უფლება აქვს ისარგებლოს მობილობით, რაც გულისხმობს ერთი პროფესიული საგანმანათლებლო პროგრამიდან სხვა პროფესიულ პროგრამაზე სასწავლო უნივერსიტეტის შიგნით (შიდა მობილობა) ან სხვა პროფესიულ საგანმანათლებლო დაწესებულებიდან (გარე მობილობა) მობილობას.
2. შიდა მობილობის პროცედურის დაწყების საფუძველია პროფესიული სტუდენტის განცხადება, რომლის საფუძველზეც დგინდება პროფესიული სტუდენტის მიერ მოდულის სწავლის შედეგების დადასტურების ან მოდულის ცალკეული შედეგის დადასტურების თავსებადობის საკითხი. შესაბამისობის დადგენის შემთხვევაში შესაბამისი ოქმის საფუძველზე რექტორი გამოსცემს ბრძანებას პირის შიდა მობილობის შესახებ აღიარებული სწავლის შედეგების საფუძველზე.
3. პროფესიული სტუდენტთა მობილობის პერიოდები, ვადები ყოველ პროგრამაზე განისაზღვრება ინდივიდუალურად სასწავლო უნივერსიტეტის რექტორის ბრძანების გამოცემის მეშვეობით. რომლითაც დგინდება:
 - საგანმანათლებლო პროგრამა, რომელზეც ცხადდება მობილობა;
 - პროგრამაზე მიღების ვაკანტური ადგილების რაოდენობა;
 - მსურველთა რეგისტრაციის ვადები;
 - მობილობის პროცედურისათვის აუცილებელი წარმოსადგენი დოკუმენტაცია;
 - სხვა პირობები.
4. პროფესიული სტუდენტის მობილობით ჩარიცხვის თაობაზე რექტორი გამოსცემს ბრძანებას.

მუხლი 6. მიღებული განათლების აღიარება

1. პირის მიერ უცხოეთში მიღებული განათლების აღიარება ხორციელდება სსიპ განათლების ხარისხის განვითარების ეროვნული ცენტრის მიერ, კანონმდებლობით დადგენილი წესით;
2. საქართველოს სხვა საგანმანათლებლო დაწესებულებაში მიღებული განათლების აღიარება ხორციელდება სასწავლო უნივერსიტეტის პროფესიული პროგრამების მენეჯრსა და შესაბამისი პროფესიული საგანმანათლებლო პროგრამის სპეციალისტების მიერ, მიღებული ცოდნის, უნარებისა და ფასეულობების პროფესიულ საგანმანათლებლო სტანდარტთან და პროფესიულ საგანმანათლებლო პროგრამასთან შესაბამისობის დადგენის გზით.
3. თუ პროგრამის უკვე ათვისებული კომპონენტის სახელწოდება მცირედით განსხვავდება სასწავლო უნივერსიტეტის პროფესიული საგანმანათლებლო პროგრამის კომპონენტისაგან, თუმცა შინაარსობრივად, ასათვისებელი კვალიფიკაციების მიხედვით იდენტური ან თითქმის იდენტურია, ის შეიძლება იქნას აღიარებული სასწავლო უნივერსიტეტის მიერ.
4. ამ მუხლის მე-3 პუნქტის გათვალისწინებით, თუ პირის მიერ გავლილი სასწავლო კომპონენტის სწავლის შედეგები იდენტურია დაწესებულების პროფესიული საგანმანათლებლო პროგრამის სწავლის შედეგების, მისი აღიარება ხდება ავტომატურად;
5. მიღებული განათლების აღიარებასთან დაკავშირებული საკითხები, რომელიც არ არის განსაზღვრული წინამდებარე წესებით, დარეგულირდეს რექტორის ბრძანებით.
6. არაფორმალური განათლების მქონე პირის ცოდნის, უნარებისა დაღირებულებების

შემოწმებისა და შესაბამისი დარგის პროფესიული სტანდარტით გათვალისწინებულ კომპეტენციებთან მისი შედარების გზით შესაძლებელია არაფორმალური პროფესიული განათლების აღიარება.

7. არაფორმალური განათლების აღიარების პროცედურები განისაზღვრება განათლებისა და მეცნიერების მინისტრის ბრძანებით. სასწავლო უნივერსიტეტის მიერ არაფორმალური განათლების აღიარება მოხდება იმ დროისათვის არსებული სამართლებრივი რეგულაციების შესაბამისად.

მუხლი 7. პროფესიული საგანმანათლებლო პროგრამის შემუშავებისა და დამტკიცების წესი.

პროფესიული საგანმანათლებლო პროგრამები სასწავლო უნივერსიტეტში მუშავდება და მტკიცდება სასწავლო უნივერსიტეტში არსებული და მოქმედი კანონმდებლობით დამტკიცებული „პროფესიული საგანმანათლებლო პროგრამების შემუშავების ინსტრუქციის და დამტკიცების წესის“ შესაბამისად.

მუხლი 8. პროფესიული საგანმანათლებლო პროგრამის შეცვლა /გაუქმება

1. დამდგარი ან მოსალოდნელი ობიექტური გარემოების დროს, რომელიც იწვევს საგანმანათლებლო პროგრამის შეცვლას ან გაუქმებას, სასწავლო უნივერსიტეტი ვალდებულია უზრუნველყოს პროფესიულ სტუდენტთა სწავლის გაგრძელების შესაძლებლობა ალტერნატიული პროგრამის შეთავაზებით (აქამდე დადასტურებული შედეგების აღიარებით), ან ხელი შეუწყოს მათ მობილობას.
2. სასწავლო უნივერსიტეტი პროგრამის გაუქმებამდე აფორმებს თანამშრომლობის მემორანდუმებს სხვა საგანმანათლებლო დაწესებულებებთან, რომელიც ითვალისწინებს სტუდენტების გადასვლის და სწავლის გაგრძელების შესაძლებლობას მათ მიერ გავლილი პროგრამის აღიარებით.

მუხლი 9. კრედიტების განაწილება

1. კრედიტი გამოხატავს ცალკეული მოდულით გათვალისწინებული ცოდნის, უნარებისა და ღირებულებების ასათვისებლად პროფესიული სტუდენტის მიერ შესასრულებელი სამუშაოს მოცულობას (დატვირთვას).
2. კრედიტების განაწილება ხდება საგანმანათლებლო პროგრამის მოდულებს შორის. საგანმანათლებლო პროგრამით გათვალისწინებული საერთო დატვირთვა მოიცავს თეორიის და პრაქტიკის კომპონენტს.
3. კრედიტების განაწილება საგანმანათლებლო პროგრამის კომპონენტებს შორის უნდა იძლეოდეს მოდულით განსაზღვრული სწავლის შედეგის მიღწევის შესაძლებლობას.

მუხლი 10. პროფესიული სტუდენტის სასწავლო საქმიანობა/დატვირთვა

1. ერთი კრედიტი ასახავს პროფესიული სტუდენტის სასწავლო საქმიანობას 25 ასტრონომიული საათის განმავლობაში.
2. კრედიტის მისაღებად პროფესიული სტუდენტის სასწავლო საქმიანობა უნდა მოიცავდეს თეორიულ და პრაქტიკულ მეცადინეობაზე დასწრებას, გაცნობით პრაქტიკას, პრაქტიკულ პროექტს, საწარმოო პრაქტიკას, დამოუკიდებელ მეცადინეობას. კრედიტის მიღება ხდება სწავლის შედეგების დადასტურებით.
3. პროფესიული სტუდენტის სასწავლო საქმიანობა (დატვირთვა) მოიცავს:
 - ა) ლექციაზე დასწრება/სამუშაო ჯგუფში მუშაობას;
 - ბ) პრაქტიკულ მეცადინეობას;
 - გ) დამოუკიდებელ მუშაობას;
 - დ) სასწავლო-საწარმოო პრაქტიკას;
 - ე) გამოცდების (შუალედური, დასკვნითი) ჩაბარებას.
4. სწავლის დროს ხდება თეორიული და პრაქტიკული სწავლების ინტეგრაცია. სწავლებისას უპირატესობა ენიჭება ახალ ტექნოლოგიებს, ცოდნისა და უნარების შეფასებისას გამოიყენება როგორც ზეპირი, ასევე ტესტური გამოცდები.

მუხლი 11. პროფესიული სტუდენტის ცოდნის შეფასება

1. კრედიტის მიღება შესაძლებელია მხოლოდ სილაბუსით გათვალისწინებული სწავლის შედეგების მიღწევის შემდეგ, რაც გამოიხატება ერთ-ერთი დადებითი შეფასებით.

შეფასების სისტემა უშვებს:

- ა) ხუთი სახის დადებით შეფასებას;

- (A) ფრიადი - მაქსიმალური შეფასების 91% და მეტი;
- (B) ძალიან კარგი - მაქსიმალური შეფასების 81-90%;
- (C) კარგი - მაქსიმალური შეფასების 71-80%;
- (D) დამაკმაყოფილებელი - მაქსიმალური შეფასების 61-70%;
- (E) საკმარისი - მაქსიმალური შეფასების 51-60%;

ორი სახის უარყოფით შეფასებას:

- (FX) ვერ ჩააბარა - მაქსიმალური შეფასების 41-50%, რაც ნიშნავს, რომ პროფესიულ სტუდენტს ჩასაბარებლად მეტი მუშაობა სჭირდება და ეძლევა დამოუკიდებელი მუშაობით დამატებით გამოცდაზე ერთხელ გასვლის უფლება;
- (F) ჩაიჭრა - მაქსიმალური შეფასების 40% და ნაკლები, რაც ნიშნავს, რომ პროფესიული სტუდენტის მიერ ჩატარებული სამუშაო არ არის საკმარისი და მას საგანი ახლიდან აქვს შესასწავლი.

სასწავლო კურსის/მოდულის მაქსიმალური შეფასება 100 ქულის ტოლია.

დაუშვებელია პროფესიული სტუდენტის მიერ მიღწეული სწავლის შედეგების ერთჯერადად - მხოლოდ დასკვნითი გამოცდის საფუძველზე შეფასება. სტუდენტის შეფასება ითვალისწინებს:

- ა) შუალედურ შეფასებას;

- ბ) დასკვნითი გამოცდის შეფასებას.

პროგრამის ცალკეულ კომპონენტში შუალედური შეფასება შესაძლოა მოიცავდეს შუალედურ გამოცდას, პრეზენტაციას, აქტივობას, საშინაო დავალებას და სხვ.

პროგრამის ცალკეულ კომპონენტში დასკვნითი გამოცდა შესაძლოა გულისხმობდეს: გამოცდის ჩაბარებას, პრაქტიკის ანგარიშის დაცვას ან პრეზენტაციის (ჯგუფური და ინდივიდუალური) წარმოდგენას (პრაქტიკის შემთხვევაში).

2. პროფესიულ სტუდენტს სასწავლო კურსში კრედიტი ენიჭება თუ განსაზღვრული შეფასების კომპონენტების (შუალედური შეფასებები, დასკვნითი გამოცდა და სხვ.) დაჯამებით უტოლდება მინიმუმ 51 ქულას. შეფასების სისტემის კომპონენტები დადებითად ფასდება, თუ პროფესიული სტუდენტი გადალახავს დადგენილ ქულათა ნახევარს ან/და მეტს.
3. პროფესიულ სტუდენტს უფლება აქვს, გავიდეს დამატებით გამოცდაზე დასკვნით გამოცდაზე უარყოფითი შეფასების (FX) ვერ ჩააბარა - მაქსიმალური შეფასების 41-50 ქულა) მიღების შემთხვევაში, არანაკლებ 10 დღეში.
4. პროგრამის ცალკეულ კომპონენტებში გამოყენებული შეფასების ფორმები და მეთოდები დეტალურადაა გაწერილი შესაბამის სილაბუსში.

მუხლი 12. პროფესიული სტუდენტის მიღწევების შეფასება ჩარჩო (მოდულური) პროფესიული საგანმანათლებლო პროგრამებისთვის

1. პროფესიული საგანმანათლებლო პროგრამის ჩარჩოდოკუმენტის საფუძველზე შექმნილი პროფესიული საგანმანათლებლო პროგრამების შემთხვევაში, პროფესიული სტუდენტის მიღწევების შეფასების წესი განისაზღვრება შესაბამისი პროფესიული საგანმანათლებლო პროგრამის ჩარჩოდოკუმენტით ან/და მოდულით.
2. პროფესიული საგანმანათლებლო პროგრამის ჩარჩოდოკუმენტის საფუძველზე შექმნილი პროფესიული საგანმანათლებლო პროგრამების შემთხვევაში, შეფასება არსებობს განმავითარებელი და განმსაზღვრელი.
3. განმავითარებელი შეფასება შესაძლოა განხორციელდეს როგორც ქულების, ასევე ჩათვლის პრინციპების გამოყენებით.
4. განმსაზღვრელი შეფასება ითვალისწინებს მხოლოდ ჩათვლის პრინციპებზე დაფუძნებული (კომპეტენციების დადასტურებაზე დაფუძნებული) სისტემის გამოყენებას და უშვებს შემდეგი ორი ტიპის შეფასებას:

ა) სწავლის შედეგი დადასტურდა;

ბ) სწავლის შედეგი ვერ დადასტურდა.

განმსაზღვრელი შეფასებისას უარყოფითი შედეგის მიღების შემთხვევაში პროფესიულ სტუდენტს უფლება აქვს, მოითხოვოს სწავლის შედეგების მიღწევის დამატებითი შეფასება პროგრამის დასრულებამდე.

შეფასების მიმართულებები და შეფასების ინსტრუმენტების ალერნატიული ჩამონათვალი მოცემულია შესაბამის მოდულში.

მუხლი 13. პროფესიული კვალიფიკაციის მინიჭება

1. სწავლების სისტემა განისაზღვრება საგანმანათლებლო პროგრამის მოცულობისა და ყოველდღიური და ყოველკვირეული დატვირთვის სასურველი მოცულობის შესაბამისად.

2. სასწავლო უნივერსიტეტი უფლებამოსილია განსაზღვროს კონკრეტული სასწავლო პროგრამის სასწავლო ციკლის დაწყების თარიღი, ასევე პროგრამის განხორციელების პროცესში სასწავლო პროცესის დროებითი ხასიათის შეჩერების (არდადეგების) პერიოდი, რომელთა შესახებ ინფორმაცია პროფესიულ სტუდენტებს მიეწოდებათ რეგისტრაციამდე.
3. სასწავლო უნივერსიტეტი პროფესიული კვალიფიკაციათა ჩარჩოს პროფესიულ კვალიფიკაციათა აღმწერით განსაზღვრავს პროფესიული განათლების ცალკეული საფეხურის შესაბამის სწავლის შედეგებს.
4. კვალიფიკაციის მინიჭების წინაპირობას წარმოადგენს პროფესიული სტუდენტის მიერ შესაბამისი საგანმანათლებლო პროგრამით გავლილი მოდულები, შეფასებები, ასევე სწავლის შედეგები.
5. სწავლის შედეგების დაძლევის დადასტურებას ახორციელებს სასწავლო უნივერსიტეტის რექტორის მიერ შექმნილი სპეციალური პროფესიული კვალიფიკაციის მიმნიჭებელი კომისია.
6. სასწავლო უნივერსიტეტის რექტორის ბრძანების გამოცემის გზით ქმნის კვალიფიკაციის მიმნიჭებელ კომისიას (შემდგომში - კომისია).
 - ა) კომისიის შემადგენლობაში შედიან:
 - ბ) სასწავლო უნივერსიტეტის რექტორი (კომისიის თავმჯდომარე);
 - გ) სასწავლო დეპარტამენტის უფროსი.
 - დ) შესაბამისი პროფესიული საგანმანათლებლო პროგრამის ხელმძღვანელი.
7. კომისიის შემადგენლობაში შესაძლებელია სხვა პირების მონაწილეობა, აღნიშნულთან დაკავშირებით გადაწყვეტილებას იღებს სასწავლო უნივერსიტეტის რექტორი.
8. კომისია იკრიბება ერთჯერადად შესაბამისი საგანმანათლებლო პროგრამის დასრულების შემდეგ.
9. კომისიის გადაწყვეტილება ფორმდება ოქმის სახით და წარედგინება სასწავლო უნივერსიტეტის რექტორს დასამტკიცებლად.
10. კომისია შეისწავლის თითოეული პროფესიული სტუდენტის პირად საქმეს, მიღებულ შეფასებებს, დაადგენს დაძლეულ იქნა თუ არა სწავლის შედეგები.
11. კომისიის მუშაობის ამსახველი ოქმი წარედგინება სასწავლო უნივერსიტეტის რექტორს დასამტკიცებლად.
12. სასწავლო უნივერსიტეტის რექტორი გამოსცემს ბრძანებას შესაბამისი პროფესიული სტუდენტისათვის კვალიფიკაციის მინიჭების შესახებ.
13. სასწავლო უნივერსიტეტის რექტორის მიერ გამოცემული ბრძანების განუყოფელი ნაწილია კომისიის სხდომის ოქმი.
14. სასწავლო უნივერსიტეტის რექტორის მიერ ბრძანების გამოცემის შემდეგ გაიცემა შესაბამის კურსდამთავრებულზე კვალიფიკაციის დამადასტურებელი პროფესიული დიპლომი დანართთან ერთად, რომელსაც ხელს აწერს სასწავლო უნივერსიტეტის რექტორი.
15. პროფესიული დიპლომი გაიცემა პროფესიული განათლების დასრულების შემდეგ.
16. პირს, რომელმაც ვერ ან არ დაასრულა/დაადასტურა ჩარჩო პროფესიული საგანმანათლებლო პროგრამით გათვალისწინებული მოდულების შედეგები სრულად, გაიცემა სერთიფიკატი, იმ მოდულებზე, რომელთა მისაღწევი შედეგებიც სრულადაა დადასტურებული.
17. პირს, რომელმაც გაიარა მხოლოდ ცალკე მოდული, მოდულით გათვალისწინებული მისაღწევი შედეგების დადასტურების საფუძველზე გაიცემა სერთიფიკატი.

მუხლი 14. პროფესიული სტუდენტის სწავლის საფასური, ფინანსური ვალდებულებები, პასუხისმგებლობის ფორმები და წახალისება

პროფესიულ სტუდენტს სასწავლო უნივერსიტეტის წინაშე ეკისრება შემდეგი ფინანსური ვალდებულებები:

- ა) სასწავლო უნივერსიტეტის მიერ დადგენილი წესითა და ვადებში გადაიხადოს საგანმანათლებლო პროგრამის სწავლის საფასური;
- ბ) სასწავლო უნივერსიტეტის მატერიალურ-ტექნიკური ბაზის დაზიანების შემთხვევაში გადაიხადოს ზარალის ასანაზღაურებელი თანხა;
- გ) ბიბლიოთეკიდან გატანილი წიგნის დაზიანების ან დაკარგვის შემთხვევაში გადაიხადოს ბიბლიოთეკის სარგებლობის წესით დადგენილი თანხა.

მუხლი 15. პროგრამის განმახორციელებელი პირი

1. სასწავლო საქმიანობის სრულყოფილად წარმართვისათვის სასწავლო უნივერსიტეტს ჰყავს მოქმედი კანონმდებლობითა და სასწავლო უნივერსიტეტის სასწავლო მიზნებიდან გამომდინარე საჭირო ოდენობის პროგრამის განმახორციელებელი პირები;
2. პროგრამის განმახორციელებელი პირი შეიძლება იყოს უმაღლესი განათლების ან პროფესიული განათლების IV ან V საფეხურის კვალიფიკაციის მფლობელი ან პირი, რომელსაც აქვს შესაბამისი პროფესიით მუშაობის არანაკლებ 3 წლის გამოცდილება.
3. IV საფეხურის კვალიფიკაციის მფლობელ პროგრამის განმახორციელებელ პირს უფლება არ აქვს, ასწავლოს V საფეხურის საგანმანათლებლო პროგრამის ფარგლებში.
4. შესაბამისი პროფესიული სტანდარტით შეიძლება დადგინდეს დამატებითი მოთხოვნები.
5. პროგრამის განმახორციელებელ პირს უფლება აქვს:
 - ა) მონაწილეობა მიიღოს სასწავლო უნივერსიტეტის სასწავლო პროცესის წარმართვაში სასწავლო უნივერსიტეტის სამართლებრივი აქტების შესაბამისად;
 - ბ) ჩარევის გარეშე განახორციელოს თეორიული და პრაქტიკული სწავლება;
 - გ) საგანმანათლებლო პროგრამის ფარგლებში დამოუკიდებლად განსაზღვროს სასწავლო პროგრამების შინაარსი, სწავლების მეთოდები და საშუალებები;
 - დ) განახორციელოს მოქმედი კანონმდებლობით, სასწავლო უნივერსიტეტის დებულებით, შინაგანაწესითა და სხვა შიდა სამართლებრივი აქტებით გათვალისწინებული უფლებები.
6. პროგრამის განმახორციელებელი პირი ვალდებულია:
 - ა) დაიცვას ამ დებულებისა და სასწავლო უნივერსიტეტის სამართლებრივი აქტების მოთხოვნები;
 - ბ) შეასრულოს ხელშეკრულებით ნაკისრი მოვალეობები;
7. პროგრამის განმახორციელებელ პერსონალს თანამდებობაზე ნიშნავს და ათავისუფლებს სასწავლო უნივერსიტეტის რექტორი.
8. სასწავლო უნივერსიტეტში პროგრამის განმახორციელებელი პირის თანამდებობის დაკავება შესაძლებელია კონკურსით ან სასწავლო უნივერსიტეტის რექტორის გადაწყვეტილებით, რომელიც ფორმდება რექტორის ბრძანებით.

9. პროგრამის განმახორციელებელი პერსონალის თანამდებობის დასაკავებელი კონკურსის შესახებ ინფორმაცია ქვეყნდება სასწავლო უნივერსიტეტის ვებ-გვერდზე. ასევე შესაძლებელია სხვა საინფორმაციო საშუალებით.

10. პროგრამის განმახორციელებელი პერსონალის თანამდებობის დაკავების შესახებ ინფორმაცია უნდა შეიცავდეს შემდეგ რეკვიზიტებს:

ა) წარმოსადგენი დოკუმენტაციის დასახელებას;

ა.ა განცხადება სასწავლო უნივერსიტეტის რექტორის სახელზე;

ა.ბ CV;

ა.გ. ორი ცალი ფოტოსურათი 3x4;

ა.დ. უმაღლესი განათლების ან პროფესიული განათლების IV ან V საფეხურის კვალიფიკაციის ან შესაბამისი პროფესიით მუშაობის არანაკლებ 3 წლის გამოცდილების დამადასტურებელი დოკუმენტის შესაბამისი წესით დამოწმებული ასლი.

ა.ე. პირადობის დამადასტურებელი მოწმობის ასლი.

ბ) საკონტაქტო ინფორმაციას;

გ) საბუთების წარდგენის ვადას.

11. პროგრამის განმახორციელებელი პირის თანამდებობის დასაკავებლად შემოსული საბუთების შემოწმებას, გაანალიზებას და შესაბამისი კანდიდატების შერჩევას ახორციელებს სპეციალური კომისია, რომელიც სასწავლო უნივერსიტეტის რექტორის ბრძანებით იქმნება. წარმოდგენილი საბუთების ანალიზის საფუძველზე კომისია შეარჩევს პროგრამის განმახორციელებელი პირის თანამდებობის დასაკავებელ შესაბამის კანდიდატებს და დასამტკიცებლად წარუდგენს სასწავლო უნივერსიტეტის დირექტორს, რომელიც მათ დანიშნავს ბრძანებით.

მუხლი 16. გარდამავალი და დასკვნითი დებულებები

1. წინამდებარე წესებს ბრძანებით ამტკიცებს სასწავლო უნივერსიტეტის რექტორი.

2. წინამდებარე წესებში ცვლილებების განხორციელება შესაძლებელია სასწავლო უნივერსიტეტის ბრძანებით.